

EPYO KHENROWA

ORITHI NI MALAXI

 Kooxukhuru vanci-ene, Munna Demos. Nto vano ninnitteeliwa murima okhala va voosiis'ula, ni wiiwa onamoona ola wothene wooreera w'atthu ala ooreera murima. Nto vano, ninniroromela wira Muluku onoothikela okhala ni hiyo ni onireeriha.

² Vano, olelo ohiyu, kinnisuwela wira eri wira kilavule olelo ohiyu, Apwiya yatthuna vale. Ni koonvekela Munna Shakarian, okathi vakhani ovinre paahi, miyo khwira, “Vano, muhikhale oovelavela. Koosuwela wira nihaana okhuma va ewoora ya namuloko n'imosi ni miyo—miyo onnikipweteya muupuwelo wothene wa okathi kawela va.”

³ Enkhala wira othene ahu onninipweteya. Hiyo ninnoona . . . Eniriwa, “Minuutu miili, minuutu miraru, wala . . .” Munna Smith, moosuwela, eyo ti yoolipa wira muhina mwa minuutu miili wala miraru. Ni koosuwela moota enkhalaa, ni kinnimoonela othunku khula mmosa. Masi hiyo nri ehuhu emosa ya okathi, varyahu. Ninrowa wa Ehimalelo, masi vano hiyo nri m'okathi.

⁴ Nto miyo kiirale, “Munna Demos, vakhani okathi ohinatthi, muhikhale oovelavela, mukivare ekhasako paahi nto kinoosuwela wira okathi wo ohiya.” Vano, kaahimalihe, kinoomaliha olelo ohiyu. Tivo kamaliha-ru, ahe, kookhalana yoosoma esya ya olelo ohiyu.

⁵ Vano nihinatthi okhunla Eliivuru, nrowe nilavule ni Mwaneene, ni muru woowuurama.

⁶ Tithi a Wirimu oophenteya, hiyo ninnooxukhuruni Nyuwo voosiis'ula mwaha wo othukumana nno, mwaha wa ele niwalyahu. Vaakhanle wira naahaana ovaha mureeriho vano, Pwiya, naamoona wira yaari yooreera okhala vaava. Tivo kinvekela wira Nyuwo mutthikele, yakhala yooreera vamaithoni Vanyu, ni mutthikele mukhalaka ni hiyo ni munikhaliheriyaka. Nto vano hiyo ninnithukumana mwa Masu. Ntoko nithukumanne ahu mwa opatthana mmosa ni mukhw'awe, niwaka onamoona wa etthu Nyuwo munnirelanyu, vano munitthuniherye nitthikele Masu niphwanye nipuro sothene iya sinkhumaya-vo. Vano, owo onrowa okhala mulipiheryo wa etthu ninnoonaahu ni wona, yiiraneyaka olelo. Munivahe itthu iya mwa Nsina na Yesu Kristu. Amen.

⁷ Vano, ntoko—ntoko murumeyi Awe, miyo—miyo kinnikhanyereriwa wa Mutthaka mmosa. Ni imaara sikina nkinreereke ohiiwiwa saana, okathi ovinre, ni khino kweekwe enookhala. Masi nkinihimya itthu imaara sikina wira kikhale—wira kikhale oovirikana, kinihimya wira kikhale naxariya. Ni okisivela ohimya ele enuupuwelaaka wira ti yoolikana. Atthu othene aakhallana e—ehaakhi ya itthu iyo, wira yooniherye muupuwelo aya mmansaya. Mwaha wa yeeyo kiryaaka eriyari anyu.

⁸ Ni Munna Shakarian, alavulaka mwaha wa ittikitti sa mavekelo muliinyani mwa mavekelo, mwaha wo woona etthu Erooho Yoowaarya... Vano, owo khohimye eyo mwaha wa miyo. Eyo mwaha wa Erooho Yoowaarya, okhala wira nkaarowa owerya wira itthu iyo. Khula mutthu onnisuwela eyo, nkaarowa owerya wira. Masi—masi eyo ti epantte yaamukhaani, enoonaanyu va. Mwaahaana okhala mapuro makina, ni oweha moota Owo onihimyawo itthu khalayi ene! Ni miyo... itthu sinrowa okhumelela, ti, iya paahi... nyuwo, ti nyuwo muniira eyo. Ti Nyuwo munimwaamini Muluku.

⁹ Vano—vano nto mwaahimwaamini Muluku, muupuwele, Owo onooleelani siiso, vaplataforma vaava va. Ni nyuwo mwakhala mutampini, Owo onooleelani siiso. Ni itthu mwiiralyanyu, ni mwahaarinanyu wira, Owo onooleelani siiso. Kahi paahi ele awo anhelaaya vattikittini ya mavekelo. Yaamuwerya ohela vattikittini vava ya mavekelo... Khayaarowa ohimya, mmo, wira “natampii,” ni muthiyan’ola “aakhala ni iya oohiphwanela,” wala siiso. Ni awo khanihela eyo vattikittini ya mavekelo, masi Erooho Yoowaarya ennivara eyo khula enamuna, moone. Munnona? Vano siiso ti... nto moota... e—epantte ya erimu, apatthani.

¹⁰ Ni miyo kinihimya ela voottittimiha, okhala wira khakhanle anci-ene a hiyo va voosis’ula, nikhuru naamukhaani paahi. Eyo ennikitikiniha, mpakha enkikhalihaaya oowuukhuwaxa, imaara sikina kintthunaaka okhuwela. Nto kakilaathi nipuro nlo, epantte ya mwaako, okerekhere wa mwaako, vaavo kinvirihaaka okathi munci-ene vo, kaakhelaka sa Muluku, kinakhuruwa ni waannya atthu ele Muluku okinnyale-awe. Ni miyo—miyo nkinthuna okhala oovirikana n’atthu. Masi nnakhala vo, okhala naxariya, kihaana okhala naxariya ni Muluku, moone, ni—ni Mutthaka.

¹¹ Nto vano hiyo nri, Apwiya yatthuna vale, nihanle okhuma naakuvaka nirowaka mapuro oohiyana-hiyana ilapo s’okhopela, muhina mwa mahiku vakhani, ni wakhala otthuna w’Apwiya. Veekkehai kinniveka mavekelo anyu.

¹² Nyuwo mwa oophenteya saana! Kimpacerya olavula, kinooliyala okathi mara, ntoko akina wa hiyo. Masi wa Munna Shakarian, arumeyi ala ooreera murima va vaplataforma, ni vo,

nyuwo othene apatthani a Yesu Kristu, kinnookhomasani mwa Nsina Nawe; ntoko mu—mmusi anyu, mwa mwiikimanyo, wa Muluku, nikhanlyahu axinna alopwana n'athiyana.

¹³ Kintthuna kikhunle, voosiis'ula, mwa Yoolempwa, Muliivuruni mwa aKalasiya, Apwiya yatthuna vale. Kintthuna kisome Yoolempwa emosa.

¹⁴ Vano, nsana ohiyu, kiiwaka mutthaka waakhumme wa munn'ihu murumeyi vaplataforma va, owo aahilavula ilavulelo. Bredesen, Munna Bredesen, mulopwana mmosa ooreera murima. Miyo...

¹⁵ Woono yeela ni ohisuwela waka ni ohisoma, ohiiwa waka oratta-ene moolumo, vano nto osuwela wira Mutthaka ti w'ekeekhai, ni owoona alopwana ntoko ole aari vapaineelini ohiyu owo, eemenle vale ni...onwerya omaliherya muthinto ole wa osoma. Khino awo khanwerya wira ele Apwiya akiitthanenlyaya wira kiire. Nkinwerya wira etthu Apwiya awiitthanenle aya awo wira yiire. Masi hiyo nivaraka muteko vamosa, kookupali wira ninoowerya ovaha Mutthaka, nakhalaru ohoolo wa Muluku paahi.

¹⁶ Nto okathi ohimmyawe o—onamoona va nsana ohiyu, ni Erooho Yoowaarya khulavula ilavulelo, ni, mutthu vamuthukumanoni, miyo kweekwe koosuwela wira eri wira ettittimiheweke eyo. Okhala wira, kinnisuwela, ni Bibilia, wira eyo Erooho ya Muluku enniruuwela etthu. Nto owo ohimmye wira, aalavunle mwaha w'epula yookiserya, epula yoopacerya ni epula yookiserya. Vano eyo ennikiphiherya muupuwelo mmosa.

¹⁷ Wira Munna Bonham aammala-ru okivaha mfukho mmosa ni ixeeke khata mwemmo, yaahimya wira, "Ela yoovaha ya mphento ya e...okhuma w'atthu." Vano, owo—owo, khivaatthuneya awo wira yeeyo. Moone, miyo nkirwenle yeeyo va. Masi miyo...owo, kiroovahiwa eyo, nto, vekeekhai, yaamukhala...khiyaavo enamuna y'ohokoloxa. Ni kinrowa okuxa, Apwiya yatthuna vale, ni kinoophavela ohela mwa soothuma saka, kaarowaka ilapo s'okhopela. Okhala wira, miyo nkinkhaliheriwa, woohikhala mireerelo, weiwo onrowaaka.

¹⁸ Ti ya esiiri vakhani, okhala wira ikereja khasinikihiya okela. Ni kinrowa ntoko mulipa-ooxaya, okhala wira mwaha w'Apwiya aka. Apwiya aroohela vamurimani vaka wira yeeyo, ni kihaana okela mwa enamuna yo woothererya. Munnona? Tivo aakhala akhili ootheiha wu, wira khula mmosa ontthuna wira kilepe ettikitti, wira kinniiraana ni yaawo ele anaamini aya, ni wira kihimye wira nikhuru *nla* nikina ti noovonya, ni nikhuru *nla* ninihimya wira anookiroiha wu kahimya-ru wira nikhuru *nla* noovonya. Munnona? Masi miyo khenkisivela eyo. Moone, hiyo na...

¹⁹ Miyo kweekwe kinniphavelaka okhala eriyari y'atthu, ota wa mitthenkeso ni ohiiwanana waya, ni oruuha ele Erooho

ya Muluku yaakhalaya ntoko ohimya ovira mwa axinna va voosiis'ula, wira hiyo khanihiyo muromolelo. Hiyo n'ana a emusi emosa. Vano, khokhanle hata muromolelo Branham. Eri emusi Branham, ni hiyo othene khanniitakaiha mw'emusini mmo, ninooyariwa mw'emusini mmo. Nto siiso, miyo, ti yeeyo kimphevelaaka othoonyerya, vo—vooreerelaxa kinsuwelaaka.

²⁰ Vano mwa aKalasiya 4:27-31, kookupali wira koolepa va, kaatthuna kisome ela ntoko yoosoma.

Okhala wira yoolempwa wira, Mutthapeke nyuwo oohiyara muhinamuyare mwaana; mwiilipihe ni mukhuwele, nyuwo muhinoone owereya wo oyara: okhala wira ole ohirina iyawe ookhalana. . . aana anci-ene onvikana ole orina iyawe.

Vano hiyo, axinna, n'ana a natiri, ntoko Isakhi.

Masi siiso ntoko ole aayariwe n'otthuna wa erutthu animulupattha ole aayariwe ni otthuna wa Erooho, siiso vanniiraneya-tho vano.

Nto yoolempwa enihimyani? Moomole epottha ni mwan'aya: okhala wira mwaana a muthiyana epottha khonrowa orithi ni mwaana a muthiyana ootaphuwa.

Tivo nto, axinna, hiyo khanihiyo aana a muthiyana epottha, masi a ootaphuwa.

Apwiya yaacererye iparakha Saya vano mwa Masu Aya ooreeraxa.

²¹ Kookhalana kamosa-kamosa, nsana ohiyu kilepaka itthu kamosa-kamosa; nto yaanikhalaka wira, okathi kaakhalanakaaka muthukumano mmosa paahi khula esumana, nipuro nlo, Miyo—miyo kaaniwerya wuupuwela Soolempwa iyo voowooneyaxa mmuruni mwaka. Masi vano nuumala miyo. . . Vano, ntoko sinihimyaaka enamuna yaamukhaani ya eperwa, kahi kinootthuna othweela va vaplataforma va. Masi vamanlyaka ovira miyaakha miloko miili ni mithanu, emaara yaneili, miyo nkinuupuwela ntoko suupuwelakaaka khalayi. Khasireere. . . Khasireere imiilya mwa Ford ula a khalayi, nto tivo kihinuupuwelaaka. Masi kaaweryaka-ru weetta, kintthuna kivaherye khula mweettelo wa ovuwa Wawe Ole okooponle.

²² Vano miyo, koonaka nto voosiis'ula, kiwehaka. . . Alakela ela enooneya ntoko yootikiniha, ni khino wa muupuwelo w'akhili pooti okhala yootapanyeya voomalela, masi ti yoomaleliha etthu kiiithaneliwaaka. Hata khula etthu yaamukhaani ethoonyeryo wa miyo. Kinooweha Eyo, woona moota eneettaaya. Ti siiso kimpchwanyaaka mutthaka aka imaara sikina, onkhala oweha ni woona moota Erooho eneettaaya, ni woona etthu *ola* onihimyawewe, *ole* onihimyawewe.

²³ Ni nyuwo mookiweha, imaara sinci-ene, ohinatthi muteko wo ovoniha, keemenle vale vaplataforma, wala kikilaanthe,

kiwehaka; Kinoona Erooho, moota Eyo eneettaaya, ni koosuwela etthu enimwiira mutthu ole okilaanthe vale. Munnona? Woonna epantte ela, epantte ela *va*, moone, ennooneya hata muhinatthi orowa vaplataforma.

²⁴ Imaara sikina kihinatthi orowa vamuthukumanoni, imaara sikina, ntoko kihinatthi hata orwa oCalifornia nno, kaahikilaathi n'ale ari ni miyo, khwira, "Enookhala etthu khata enrowa wiiraneya, *ela* enimwiiraneya *va*, ni *ela* enookhala *va*, *ela* enoorowa enamuna *ela*," moone, okhala wira eri mwa Erooho ya Muluku. Owo ti . . . Owo aanisuwela itthu sothene okhuma wopaceryani, moone, ni siiso Owo ti Ole Ohinimala.

²⁵ Vano nto kiwehaka, voosiis'ula, Munna Jewel Rose, mpatthani mmosa oophenteyaxa ni munn'ihu hiyo othene, moota owo ovennyawe khusoma Masalmo ale. Nkawehani moota eyo elikanne aya, ntoko owo saahimalyawawe, "Kintthuna koone muthinto xeeni w'epyo emphwanyaneya mwa nyuwo." Nsana ohiyu, Erooho khulavula khwira, ni mwaha wa, "Epula yookiserya, epula yoopacerya ni epula yookiserya, soopiili simwaraxiwaka mahiku ookiserya." Ni voosiis'ula, "Epyo emphwanyaneya mwa nyuwo." Moone, Erooho elavulaka, nwehe moota Eyo yiirale aya mwa arumeyi ala, ni siiso, voosiis'ula. Tivo kinkuxa mwah'ola: *Epyo Khenrowa Orithi Ni Malaxi*.

²⁶ Eyo yoosoma yootikiniha saana, masi, *Epyo Khenrowa Orithi Ni Malaxi*. Nto kikuxaka, kikumihaka imaliheryo saka ya yeela, ahiiso yoosoma aka, kiireke, mwa aKalasiya 4:27, tthaaru, Paulo va vekeekhai onihimya mwaha wa osuulu w'ekeekhai wa aana aili a Abrahamu. Vano, *ela*, miyo kintthuna kirumeele yeela wira nyuwo tthiri muhialele. Ni kavikana-ru okathi, kinoothikela olelo ohiyu. Ni kintthuna wiixuttiha, voolikana-ene ntoko nisomi na exikola ya Ttiminku, wira nyuwo, kookupali, mukhalane maiwelo oolokaxa.

²⁷ Nto miyo . . . Ni amosa-amosa a nyuwo alopwana mwa—mwa ooweryaxa wira yeela okivikana miyo, vano . . . miyo nkihiyo teyooloku, hata vakhani. Nto siiso nyuwo mwaahikeemererye mwa Yeela, mwiisooneke paahi ntoko miyo kiisoonaale aka nsana ohiyu munna mmosa muthiyana va aakipakenle awe etorta ya eserexa. Kiryeene wawaka—wawaka . . . okatthi waka woteeli voosiis'ula, miyo—miyo kaaphwannye enuku, masi nlelo kitthikela kikhuuraka etorta. Miyo kaapwehale enuku epantte aya paahi. Tivo, ti, ele muhinaamini anyu wa Yeeyo, muhiye paahi, moone, nto mutthikele mulyaaka ele enuupuwelanyu wira ti yoolikana.

²⁸ Vano, Paulo onaahimya aana aili a Abrahamu, yaawo, mmosa aya aakhalanne ni Saara nto mukina aakhalanne ni Hakari. Vano hiyo ninniphwanya *va*, ni ninnisuwela wira ni Soolempwa, wira Muluku khonathoonyeriweke mwa piili.

Enkhala mwa tthaaru. Okathi wothene mwa tthaaru, Muluku t'onkhalaawe ooloka voomalela.

²⁹ Matemaatika a Bibilia anvara muteko voolikana. Muluku ommalela mwa tthaaru, onkokhoreliwa mwa thanu na piili, ni siiso. Moone, tivo hiyo—hiyo ninniphwanya wira matemaatika a Bibilia khanavonyeke.

³⁰ Ni nihaana va aana aili a Abrahamu, nave nlelo ninwerya okhala alipa-oorithi paahi nakhala-ru mmosa wa aana awo, wala mwaana a Abrahamu. “Okhala wira hiyo nikhwaaka mwa Kristu, vano ninkhala osuulu w’Abrahamu, ni n’atthu oorithi vamosa ni Yoowo ntoko sinihimyaawe natiri,” tivo Abrahamu ohaana okhalana Mwaana mukina.

³¹ Vano, noosuwela wira mwan’awe oopacerya aari ni Hakari, ni ninniphwanya wira mwan’awe aneili aari ni—aari ni Saara. Masi owo aahikhalana Mwaana a neeraru, yoowo aari Yesu. Vano, eyo pooti okhala ntoko yootikiniha, masi ti yeeyo hiyo enrowaahu ophavela oleeliherya. Ntoko sihimalyaka, Muluku kweekwe oniithoonerya Mmansawe, kweekwe oloka voomalela, mwa tthaaru. Ni miyo koohimya voowooneya ohoolo w’atthu othene vano, ni vanci-enexa wa mateyooloku ahu, wira ithu iya ti enamuna sinoonaaka paahi, moota sinkirweelaya.

³² Ntoko wopaceryani, Muluku, Muluku aakhala meekhaawe, okhala wira Owo aari Ole Ohinimala, moone, hata khaari Muluku. *Muluku* ti “etthu enikokhoreliwa.” Ni Logos, ntoko hiyo siniitthanahu Yeeyo, Masu yaakhumme wa Muluku, Eyo, khula mutthu onnisuwela wira Nle naari Nlaikha n’Apwiya, wala Masu a Apwiya, yaatthanre aIsarayeli eviraka mothakoni; Nlaikha no waataana, Logos yaakhumme wa Muluku. Vano nto Logos eyo khwiipaka erutthu khukhala ni hiyo. Vano niri mwa Yohani Oowaarya 1, “Wopaceryani naari Nsu, Nsu naari ni Muluku, nto Nsu naari Muluku.” Nto vano, okhala wira Owo oovaha ekumi Awe mwaha wa hiyo, nto Erooho Awe enninitthikela. Yesu oohimya, “Nihiku nenlo munoosuwela wira Miyo kiri mw’Atithi, Atithi mwa Miyo; Miyo mwa nyuwo, ni nyuwo mwa Miyo.”

³³ Moone, Owo Mulukuu, okathi wothene, Muluku aisoonehaka Mmansawe, avaraka muteko mwa wakathi soovirikana. Tivo ale araru, a, Tithi, Mwaana, ni Erooho Yoowaarya, ti Muluku mmosaru avaraka muteko mwa mikhalelo miraru. Ni hiyo olelo na mmosaru, Ekereja Eneene, mukhalelo wa muupuwelo wa Muluku ohinatthi opattuxiwa olumwenku, wira akhalane e—Ekereja. Tivo ale ari mwa Kristu yaari mwa Kristu wopaceryani, yaari miyuupuwelo Sawe, ni miyuupuwelo Sawe ti mikhalelo Sawe.

³⁴ Va osuulu ompacerya, muhina mwa natiri. Ni Abrahamu va aahihoverya vakhani, mwa Iximayeli. Ni kintthuna kiwooniheni mikhalelo miraru sa seiya, sa Epyo ela hiyo enrowaahu olavula,

yeeyo ehinrithi ni malaxi. Vano hiyo ninniphwanya wira, wopaceryani va, wira Muluku aahinvaha Abrahamu natiri.

³⁵ Owo aavanhe natiri Atamu, toko. Nto eyo yaari, ahiiso, waataana waahikhalana soothhunea. “Mwaahiire-ru *ela*. Mwaira-ru *Ela*.”

³⁶ Masi okathi Owo onvahale awe Abrahamu, waari voohitthuneya etthu, “Miyo kiihira eyo.” Owo khona... Etthu Owo iiralyawe, waari voohitthuneya etthu, Owo aahinvaha Abrahamu. Vano, ni mwa yeeyo, ya Abrahamu okhalana natiri, tivo nihaana okhala Osuulu w’Abrahamu. “Khaari Abrahamu paahi, masi Osuulu awe nuumala owo.” Vano nyuwo mwaweha vale, khiwaari “osuulu wowaatta” nuumala owo, masi “Osuulu” nuumala owo.

³⁷ Vano ninniphwanya wira natiri, Saara amuhoverya vakhani, ni Saara khumuhimeerya Abrahamu wira amukuxe Hakari ula, mwali, a wEjitu, wira akhale mwaar’awe, ni mwa enamuna yeeyo Muluku t’arowaawe ovenxa osuulu ula wa natiri.

³⁸ Vano, moone, wa ele kihimalyaka nsana ohiyu, khula mweettelo okhumaka mwa ethhokiheryo ele yoopacerya ya Muluku enniriha etthu yothene. Nihikhumeke mwa Masu ale oopacerya. Awo aakhalana... Naahilavula yeeyo nsana ohiyu, ahiiso musuri ohiyu, kiireke, mwaha wa Palaamu. Owo aahaakhela waakhula wa Muluku, woolukama ni woowiiweya, “Muhirowe!” Masi Owo orina otthuna woohiyererya. Ni nyuwo munoowerya ovara muteko mwa yeeyo mwatthuna vale, ni Muluku onimwiiriha eyo omuttittimiha Yoowo, masi nlelo kuhiyo otthuna wooloka wa Muluku. Ni naahaana wiilipiha wira nikhaleke mwa yeeyo, otthuna Wawe wooloka, kahi otthuna Wawe woohiyererya. Omwene wa Muluku, yoowo Owo... ori mulaponi olelo, ono... khokhanle okhalihwaka, tthiri, mwa otthuna woohiyererya. Ohaana otthikela otthuna Wawe wooloka.

³⁹ Vano hiyo ninnoona va wira Saara, vaamanlyawe Muluku omuleela Abrahamu wira mwaana aarowa oyariwa ni Saara, wira aamureeriha olumwenku, vano Saara aaroohoverya. Kintthuna wira nwehe, wira eyo khiyaarwiye ni Abrahamu; masi ni Saara, muthiyana. Nto owo aaroohoverya, ni iirale, “Mmukuxe Hakari.” Ni Abrahamu khaatthuna wira eyo, masi Muluku khimuleela wira arowe ni iire nnakhala vo. Tivo owo aahiira, aahihoverya vakhani. Vano, Isakhi, aryeene ootaphuwa ni muthiyana aarina natiri, khaakhanle okhalaka mulipaoorithi ni Iximayeli, muthiyana epottha, a ohoverya.

⁴⁰ Ti yeeyo Paulo aaphavelawe ohimya va. Moone, nipuro etthu enihoveriwaya, ni oruaha etthu khata ya Muluku, eyeettiheryo khata ya Muluku, masi khenrowa orithi ni eyeettiheryo yoopacerya ya Muluku. Munniwa? Moone, khekhanle orithiki.

⁴¹ Vano mwaha wa yeeyo kikhanyaka voolipaxa olelo. Ni kuupuwela wira ola waamukhala okathi wooreerela, okhala wira nkisuwenle okathi xeeni-tho onrowaahu okhala vamosa, ni, khino kaamuwerya, mwa enamuna emosa Muluku aamukikhaliherya owoonihani mwaha wa xeeni kihinreere aka olokoha etiini yoothhokihiwa. Munnona? Moone, khekhanle orithiki ni ethhokiheryo yoopacerya ya Muluku, okhala wira mutthenkeso kahi wa Muluku. Ti wa mutthu. Ekereja yoopacerya etonko wiitthokiha, mulaponi mothene, yaari ekereja Katolika y'oRooma oNicea, Rooma. Wiisuupulula 17, ohimnye wira, "Owo aari namuttompe, ni an'awe othene yaari anamararuwa." Nto namuttompe muthiyana ohinkhala voororomeleya wa iy'awe, ni namararuwa etthu emosaru. Masi, moone, nnakhala vo, yaahiphiyerya okhala ekereja. Eyo eyeettiheryo yoothhokihiwa ni enivalaaniha oxinna. Niphavenle otthokiha ikereja sothene vamosa. Khenrowa ovara etthu; khenavareke etthu. Khenkhalakhala ovara etthu. Mwaataano wa Ikereja sa Mulaponi mothene, awo paahi a . . . iyo siri ota wa ethhokiheryo ya Muluku.

⁴² Vano nyuwo muniira, "Nyuwo mw'ani, mutthu mmosa eemenle vo ohirina osoma woopacerya?" Khivanvirikana hata vakhani, ele ekhanle osoma. Kuhiyo osoma waka kimpavelaaka olavula.

⁴³ Masu a Muluku kinlavulaaka, moone. Ni milipiheryo iya munoonanyu mmutekoni, nkihiyo miyo, ti Muluku omphavela wooruuhelani yeeyo nyuwo, wira eyo Ekeekhaii. Muluku aamukhalana-vo etthu ni yowoothiwa? Vano ekhale ottaiwene wa miyo, omurumeela Muluku aarowa oreeriha etthu yowoothiwa. Ekeekhai Owo onreerihawe, Ekeekhai Owo aattittiminhe awe.

⁴⁴ Vano, Iximayeli khaakhanle okhalaka mulipa-oorithi ni Isakhi, okhala wira mmosa aahihoveriwa vakhani, ohoveriwa vakhani paahi. Owo aari mwaana, owo nlelo aari epyo y'Abrahamu, masi kahi enamuna yoolikana ya Muluku ya yeeyo: Iximayeli. Vano kaamuwerya oviriha okathi munci-ene ni mwaha ola, masi kinwehererya wira Erooho Yoowaarya enimooleelani yeela mwa enamuna y'ekeekhai entthuneya okhala.

⁴⁵ Vano vakhala wira awo, vakhala wira Iximayeli ni Isakhi khivaaweryaneya orithi vamosa mwaha wa ethhokiheryo yoopacerya ya Muluku oranttelihwa ni e—ethhunelo yoohiyererya ya Muluku, enamuna yoohiyererya Muluku tthiri aareerihalyawe, nnakhala Ekereja ya erooho olelo khekhanle orithiki ni muromolelo. Miromolelo, Muluku oreeriha, ntoko Owo simwiirenlyawe Iximayeli, masi ale a Muroohoni khanrowa orithi n'akina. Ti yeeyo. Onookhala, okhumaka mukereja muromolelo (yeeyo eniitthaniwa ekereja, ekereja y'erutthu), onookhuma Mwaakameliwa a Kristu, Oothanliwa.

⁴⁶ Vano vo, etthu enikihaaxa ewoora ela, osuwela wira hiyo ninnoona miromolelo iya sothene okela mwa yeela ninsuwelaahu okhala e...eniitthanahu epula yookiserya, wala, oyeehiwa wa Erooho. Nyuwo munnisuwela wira Yesu oohimnye, wira, “Eyo yiiraneya-ru, yaarowa okhala emalelo”? Okathi, mwali harusi oovahuwa ni ole oosuwela yahaarinthi aya vamosa. Tthiri okathi...Mwali harusi oovahuwa, owo aari harusi, ahaarina Makhura paahi. Masi okathi owo oruulyawe othuma Makhura, waari okathi ene yoowo Mutheli aaruulyawe. Nto owo aahihiwa, okathi aaphavelawe othuma Makhura. Munniwa saana? Kintthuna wira eyo ekele muhina, vooreera saana. Vano, veekkhahi nkinrowa-tho okhala ookelela ohoolo ni mwaha owo. Vano, nnakhala a Erooho ni a erutthu khakhanle orithiki vamosa.

⁴⁷ Mwaha wa yeeyo Okuxiwa, Mwaakameliwa, mwali harusi oosuwela, oowiihaneliwa okhuma, ootthommwa khalayi ene, oothanliwa! Vano, nyuwo alipa a nakoso khimwaarowa weettiherya muteko anyu ntoko atthu kamosa-kamosa aneererya wuupuwela wira Muluku oneettiherya mutthokiheryo Awe, piswapiswa. Muluku aahisuwela, ohinatthi opattuxiwa olumwenku, t’ani aarowa woopowa ni t’ani ahaarowa woopowa. Mwaha wo otthoma, mwaha w’osuwela khalayi ene, Owo aahimoona khula mempuru, khuhela khula nsina Muliivuruni mw’Ekumi ya Mwaapwittipwitthi, ekereja ehinatthi opacerya. Yesu aarwiye omphavela ni omoopola ole aari Muliivuruni mwemmo. Owo oothuma Eliivuru ya Nvuluxo. Yaahirimeela, vano Owo khunivuluxa, ni masina othene yaari Muliivuruni mmo avuluxiwe okathi Owo onivulunxe awe.

⁴⁸ Nto, ntoko sinihimyakaaka imaara sinci-ene, nyuwo munnisuwela eyo. Tivo nyuwo muryaanyu va voosiis’ula, munkhumelaanyu ota wa mitthenkeso iya sothene ni itthu siiso. Nyuwo muri...Yookhala Etthu enoopurulani. Ntoko waryaya muupuwelo aka mukhaani, wa xawawe uurameliwe vathi va mwalyakhu, moone, nyuwo—nyuwo munnisuwela wira yookhala etthu evirikanne. E—ekereja khiyaarina e—etthu yoosiveliha. Masi, nyuwo, mwiiwa etthu ekina waari okhuwela, khusuwela wira, muyareliwe Yeeyo. Nyuwo mwa epantte ya Yeeyo. Nyuwo, munnilikanela Yeeyo, ntoko eluuva pantatani. Tivo hiyo nithukumanne ahu va voosiis’ula, okhala wira, ntoko ame aka atokweene a okuusini yaahimyakaya, “axipalame a mapururu oolikana aneetta vamosa,” okhala wira nyuwo murina itthu muniiraananyu.

⁴⁹ Anakhuku ni ipompa kharina etthu vamosa. Elyelo aya ti yoovirikana, enaamwi epompa eweryaneyaka othoholiwa vathi va nakhuku. Ti yeeyo. Entthariha ele ekhanle aya, opacerya wene. Vano, ni mwa yeeyo, enaamwi, e—epompa yaarina okhapeleliwaka okathi vakhani ni ole, ni nakhuku ole, masi vookiserya eyo yaamumphwanya mwaapara aya.

⁵⁰ Ti yeeyo Ekereja eniiraaya olelo, tthiri Yesu ti Masu ni Owo ti Mutheli, nto Mwaakameliwa epantte ya Mutheli. Tivo Masu arina omaliheriwa olelo ti epantte emosaru ya Masu yaamaliheriwe nihiku Nawe, ni awo Masu mamosaru, musuwelelo mmosaru, Ekumi emosaru.

⁵¹ Maana, okathi Muluku onvalaaninhe awe Atamu, owo aari soopiili. Ninniphwanya wira, Atamu aari erooho, opacerya wene. “Owo aampanke mutthu ailattanihaka Yoowo Mwaneene, Owo aampattunxe mulopwana ni muthiyana.” Vano nto, Maphattuwelo 2 ni siiso, Owo aahimpaka mutthu mu... okhuma vatthayani v’elapo. Mutthu opattuxiwe oolattanihiwa ni Muluku (Muluku Erooho), tivo owo mutthu erooho. Vano okathi Owo okhanlyawe mutthu a erutthu, erutthu ya enama elapo ya vathi, Owo ono—Owo onooniherya, onimooniherya ya Mwaakameliwa. Owo khaakunxe ampaka ookhala mukina, masi Owo aakunxe epantte ya Atamu, yoopattuxiwa yoopacerya, aakuminhe mwa yoowo, niparari nimosa mpararini mw’awe; vano khukumiha erooho y’othiyana mwa Atamu, khuhiya erooho y’olopwana mwemmo, khuhela epantte y’othiyana. Tivo, epantte ya erooho awe, epantte ya erutthu awe; erutthu ya erutthu awe, nikhuva na nikhuva nawe; Masu a Masu Awe, Ekumi ya Ekumi Awe, ni ti siiso Mwaakameliwa okhanlyawe wa Kristu!

⁵² Mwaha wa yeeyo Okuxiwa Osuulu wa Omwene ohaana orwa toko. Nto anamukhwa akina khankhala mpakha iyaakha ekonto emosa, nuumala yaahiruhiwa Wolamuliwani wa Ehice Yootteela. Moone, khokhanle Olamuliwa wa Osuulu wa Omwene, wala Osuulu wootthommwa wa Abrahamu. Vano nyuwo mwamukuxa Yohani Oowaarya 5:24, nwiriyane ela, “Ole oniiwa Masu Aka, ni onimwaamini Ole okirumme, ookhalana Ekumi ehinimala.”

⁵³ Vano moota xeeni eyo yaarowaaya okhala yoovirikana saana ni ateyoloxiyya ahu anci-ene? Vano kaamuwerya okhumela nno ni omuleela namuhapaliwa, “Munnaamini?” “Vekeekhai!” Mulopwana mmosa ni mwaara a mulopwana mukina, “Munnaamini?” “Vekeekhai!” “Mwaahikhala vamuthukumanoni nsana ohiyu, wira mwiiwe Masu?” “Vekeekhai!” “Munnaamini Yaawo?” “Vekeekhai!” Owo onoohimya paahi.

⁵⁴ Masi otaphuleliwa woopacerya wa Masu ala, “Ole *oniiwa saana* Masu Aka, ni onimwaamini Ole okirumme.” “Ole oniiwa saana,” eyo ti wii, ole onoonihiriwa Yaawo.

⁵⁵ Yesu ohimmye wira, “Khaavo onwerya orwa wa Miyo ehikhanle wira Atithi Aka anoomuruuha. Ni othene ale Atithi Aka akivahalyaya, animoorwa. Ipwittipwitthi Saka, ipompa Saka, sinniwa Nsu Naka. Oohimusuwela iyo khasimmutthara.” Nto Nsu na Muluku exeeni? Ti Moolumo a Muluku. Exeeni

ekhanle nsu na mutthu woohikhala nuulumo nawe? Awo Masu a Muluku; awo animwiiwa Masu a Muluku.

⁵⁶ Osuulu w'erutthu tivo waari namakuxa paahi, mwa Iximayeli voopacerya, Isakhi vaneili, vano khunarwa mpakha ophiyerya Osuulu. Siiso ntoko mutathi, ecera, ni nikukhu, na nakhuwo. Vano, va, mikhalelo miraru sa epyo sinnooniherya elatarato y'ekeekhai kintthunaaka wira nwehe ni miyo voosiis'ula. Hiyo ninnoona va.

⁵⁷ Ni kiryeene oohisoma, kihaana okuxa itthu s'ephattu kinoonaaka, wira kilikanyihe itthu sa erooho kinivahiwaaka, okhala wira nkaarowa owerya okhaliha yoothokeleleya wa nyuwo mwa hata elavulelo.

⁵⁸ Ni, khula enamuna, Muluku kweekwe onthoonyerya ya erooho ni ya ephattu. Ahaakhanle Bibilia, nlelo kaamusuwela wira oKristu ti w'ekeekhai, okhala wira elapo yothene enrukurerya mwa okhwa, ovithiwa, ni ohihimuwa. Ephattu empaka okhwa, ovithiwa, ni ohihimuwa.

⁵⁹ Nkawehani ephwamwaasi enkhuma mmwirini, moota enruuhaya ntaakhuru, ni muhokorokho, enoomora; entthikela vathi wa eyiita yooriirya, vathi va etthaya; enoowela-tho okathi w'ephovo, ni ekumi esya. Khula mwaakha, ekhalelaka onamoona wira yookhala ekumi, wookhala okhwa, wookhala ohihimuwa.

⁶⁰ Nsuwa nimphattuwa voosiisu, mwaana mukhaani onaamuyariwa-ru, ootteettheya saana. Ewoora ya neethanu na piili wala thanu na tthaaru, onipacerya orowa oxikola. Ewoora yanamuloko wala yanamuloko ni emosa, onoomaliha ekoleexiyu. Nnimwaarya mwa ikuru saya, okhuma ewoora ntoko yanamuloko n'emosa mpakha ntoko yaneeraru, nto ninoopacerya otteettheya. Makaaripi ninootupweela, ninkhala nootteettheya, mutthu oowuuluvala. Eyo t'imalelo aya, nlo nnimookhwa? Nnari. Ninoovenya-tho voosiisu aya. Munnona?

⁶¹ Ephattu yothene, Bibilia anyu tthiri eekeekhai onkhalela onamoona ni Bibilia ola! Nto ti yeeyo kimpavelaaka owoonihani voosiis'ula vano, mwa ephattu munimoona Masu a Muluku, oopakiwa wa ma—Masu a Muluku, okhala wira ephattu ti epakelo ya Muluku.

⁶² Ntoko siyensiya, awo amphwanya mekaanika ni malamulo a ephattu, masi khansuwela ele ekhanle ephattu eyo. Awo khansuwela Ekumi ya ephattu. Owo Mulukuu. Tivo, mekaanika ehikhalanne tinaamika khinreerela etthu.

⁶³ Vano, mutathi, ecera, ni nikatamphe, nwehe. Hakari va aathoonyerya mutathi, yoowo waari ekumi yoopacerya yaapacenrye mwa natiri. Saara onthoonyerya ecera, ahiiso ekhitta, enkhuma mucerani. Maria, harusi, aatthonyerya ni aahikumiherya Epyo y'ekeekhai ya erooho, wira akumiherye mutathi tthiri w'ekeekhai. Hakari ni Saara, oowaili waari

mwaha w'ekhapa. Masi Maria, harusi, waari ni owerya wa Masu yaalaiheriwe ni Muluku, mwa oyariwa ni harusi. Owo aahikumiherya Epyo yooloka. Mutathi, Hakari, mwaara aneili, mwaha wo omuhoverya natiri, avaraka muteko mwa ohoverya, vakhani.

⁶⁴ Kinwehererya paahi, wira Muluku anikhaliherye. Miyo nki...Kintthunaxa, wira moone yeela. Muhihoveryeke hata vakhani epante ya Yaawo. Muhaana okuxa Awo siiso ntoko aryaaya. Awo khandthuna hata otaphuleliwa. Bibilia onihimya wira, "Masu a Muluku kahi ootaphuleliwa ni mutthu mmansawe." Muluku khamphavela hata ixikola sahu wira sitaphulele Masu Awe. Okathi Owo onlipiheryawe Yaawo n'ukhaliha makumi, iwo p'utaphuleliwa Waya. Okathi Muluku iralyawe, "Okhale okokola," waahikhala okokola. Eyo khentthuneya otaphuleliwa. Okathi Owo iiralyawe, "Mwali harusi onoorupala," owo aahirupala. Khentthuneya otaphuleliwa.

⁶⁵ Hiyo kxanimphavela sothene iya, iseminaariyu saya ni itthu sinaavara atthu, "Ahe, *hiyo* nookhalana otaphuleliwa. *Hiyo* nookhalana otaphuleliwa."

⁶⁶ Muluku Mwaneene onnitaphulela Masu Awe Mmansawe. Owo khommutthuna hata mutthu wira amutaphulelele Yoowo. Owo iirale, "Enimwiiraneya," vano enniiraneya. Owo aahihimya wira mahiku ookiserya Owo aamurowa omwarexa Erooho Awe, Owo oomwaraxa. Nkincala ele miromolelo saarowaya ohimya, nnakhala vo, Owo ohiira, okhala wira Owo aahihimya wira aamwiira. Tivo, Eyo khentthuneya otaphuleliwa, tthiri Muluku ontaphulela Mmansawe.

⁶⁷ Ni itthu iya munoonaanyu, sinkhala ntoko mwiiriirya wa nyuwo vano, vakhala siiso...Muupuwelaka vale muteko anyu, nyuwo aPentekosite, ottuli wu miyaakha miloko miraru wala miloko mixexe sivinre, waari wa mwiiriirya saana wa e—ekereja ya aMetotista ni aPatista, ntoko Ela ekhanlyaya wa nyuwo olelo. Masi vano mphwanye Mmasuni. Kimphavela owoonihani ntoko nyuwo saaphavenlyanyu owooniha awo. Vano nto Muluku arukunuwa khuhimya wira Ela ti siiso, Mmasuni, vano olipiherya wira ti siiso, iwo p'utaphulela wa Muluku Mwaneene. Khontthuneya hata nutthu wira ootaphuleleni.

⁶⁸ Vano, Hakari, ni "vakhani"! Muupuwele, khamukhanle okumihaka Nuulumo nimoso Vo. Ni Yesu oohimya, mwa Wiisuupulula, wookiseryani wa Eliivuru. Ni woopaceryani wa Eliivuru, Kristu ohimye wira, "Khula mutthu onrowa okumiha Epante emosa ya Masu ale!" Nuulumo nimoso paahi noohitaphuleliwa saana, nooruha iretta sothene, okhwa, nitonko ahu okhalana. Ahe, vakhala wira Muluku, Yoowo okhanle oowaarya, ooweha vathi; ni evitikavitika ela yothene ekumihariwe mwaha wo otaphulela voovonyeya vakhani

Nuulumo nimosa, ni etthu p'itthu yaamukhaani envirikanya Masu awo maalupale wookumiherya evitikavitika ela yothene; ni ohaawa, ovuwa ephome ni okhwa wa Mwan'Awe Yoowo, wira atthikele waataaniha etthu ila yootakhala wa Yoowo; ninrowa okela sayi mwa khula etthu yoohikhala osuka Masu othene?

⁶⁹ “Ahe,” nyuwo muniira, “Munna Branham, eyo yaari mwa Maphattuwelo.” Miyo kihoona yeeyo, moone.

⁷⁰ Masi mukihye kooleleni, Wiisuupulula, eyo epannte yookiserya ya Eliivuru. “Ole onrowa okumiha Nuulumo nimosa Muliivuruni mwa oprofeta ola, wala waacererya nuulumo nimosa Mwemmo, mpantte awe onookumihiwa Muliivuruni mwa Ekumi.”

⁷¹ Yesu oohimya, eriyari ya Eliivuru! Awo t'anamoono anyu araru emaara ekina: Maphattuwelo, Waataana Wa Naanaano, ni nihiku n'olelo. Yesu ohimye wira, “Mutthu khankhala mukumi ni yoolya paahi, masi ni Masu othene ankhuma mwaano mwa Muluku.”

“Ahe, Owo khaatthuna ohimya eyo.”

⁷² Owo aalavula n'atthu yaari mateyooloku, ale oohimaxiwa. Anamukuttho ale, axitiithi a axitiithi a axitiithi a axitiithi a axitiithi aya yaahaana okhala anamukuttho. Otaphulela voovonyeya Nuulumo nimosa na Yaawo, vano, yaari ehukumu ya mokhwani mara. Awo yaahaana ovonyiwa ni maluku, mwaha wo ovonya Nuulumo nimosa. Masi awo yaarina otaphuleliwa woovonyeya wa Yaawo. Tivo okathi Masu Mmansaya; okathi Muluku aalaihenryawe onveeleliha Mesiya, ni khunveeleliha mmittittini Owo aahimye awe wira Owo t'arowaawe orwa, awo yaarina muttitti woovirikana wira Awo aputaputeliwe-vo.

⁷³ Mukihye kihimye ela: Ti siiso olelo, wira awo khansuwela Yaawo! Kahi vanttittini va muromolelo wala akhili. Ari mmuttittini mwa owerya ni ohihimuwa, ni wooniheriwa wa Kristu ohihimunwe, enamuna Muluku olaihenryawe Yaawo, nave kahi mmuttittini mwa miyuupuwelo s'atthu sa Yaawo.

⁷⁴ Vano, Hakari, mwaha wo ovirikana vakhani, mwa muthiyana, kahi mwa Abrahamu vano. Abrahamu khaatthuna wira eyo, masi Muluku khumutthuniherya wira okhala wira owo...Etthu emosaru, Owo aahimuhiya Palaamu okelela ohoolo. Vano nwehe, mwaha wo ovaanyiha vakhani Yaawo, owo aahimuyara Iximayeli, yoowo aari mutthu oowali, oohixinttiwa nnakhala. Owo aakhala ni muura awe. Owo aari mutthu oowali. Nlelo ti siiso, olelo.

⁷⁵ Vano Saara, ekayaya, ahiiso ekhitta, Saara, mwaara eekeekhai a natiri, aamuyanre mutthu ooreera murima, voopatili khukumiherya nloko noolaiheriwa.

⁷⁶ Vano, masi, Maria, voohikhala ekhapa, masi ni natiri, siiso ntoko Abrahamu aamwaakhenlyawe natiri a Muluku, Masu a

Muluku, masi aahimwaamini natiri, “Miyo kiri va murumeyi a Muluku,” moone, aahikumiherya kahi mutathi, masi Epyo yoopacerya, okhala wira Owo aari Masu Abrahamu aaminni awe ni Maria aaminni awe.

⁷⁷ Vano, Maria khaari Epyo, owo aari nikatamphe paahi na Epyo. Aili akina yaari anamakuxa ekumi, epyo y'erutthu paahi. Maria khaari Epyo, yoowo ene; masi ntoko waamini Masu a Muluku, aahiruuha elatarato y'ekeekhaixa ya Masu, okhala wira Owo aari Masu. Masi ntoko nikatamphe, e... na etriku, enuku ya etriku, nikatamphe nirina etriku muhina mwaya ni ninookhapelela mpakha eyo owerya wala ottokottha wira eroweke mmansaya. Munnona? Nto, yaari Epyo Eneene yaamuhin'ye. Siiso ntoko, Epyo yaari mmirimani mwawe, owo khaari Epyo. Owo khokumihenrye Epyo. Muluku ti Epyo.

⁷⁸ Vano, ephome nto, atthu anci-ene anuupuwela wira yaari ni ephome ya muYuta hiyo noopoliwe-ahu. Ni akina yiirale, “Ahe, hiyo nookhalana ehaakhi mwa Amalapo, okhala wira Rahapi namuttompe ni—ni Ruthi mMowabi, n'akina, awo yaari Amalapo.” Nyuwo khamurina ehaakhi mwa yeeyo nnakhala, hata mmosa wa awo. Owo khaari muYuta nnakhala Mmalapo.

⁷⁹ Owo aari Muluku, Logos, Masu yaakhumme wa Muluku. Okathi, Eyo epacenryaya ophuramwela elapo, nto khukumiherya ekumi ya mphareya. Okathi Erooho ya Muluku, Logos, Masu, Muluku aahimmye awe, “Ekhale,” nto vale khurwa Logos, akhanle Masu. Nto Masu khupacerya o...okhala wira sothene iya saari muLogos; Masu othene a Muluku, Bibilia othene, a khula okathi. Nto okhala wira Logos yaahipacerya omumulela elapo, yaahikhumelela ekumi ya mphareya; ni yinnuwaka, ekumi ya axipalame, ekelelaka ohoolo mpakha ekumi ya axinama. Nto vookiserya yaahirwa etthu mwa ethooneryo, wala yaalikana ni ele yaavira, ephuramwelaka yeeyo, Muluku, mutthu oolattana ene ni Muluku.

⁸⁰ Mutthu ole aahimora, ntoko epyo erinaaya omoraka. Vano nto Muluku khupacerya ophuramwela vasulu va yeeyo, vamonre aya. Owo khunvexa e—Enokhi mmosa, Owo khunvenxa Eliya mmosa, Owo khunvenxa Moise mmosa, Owo aahinvenxa profeta numala profeta, atthunaka ohokoloxa-tho elatarato ele. Nto, vookiserya, mulaponi khurwa elatarato yooloka ya Muluku Mwaneene, yoowo aari Muluku, Logos khwiipaka erutthu khukhala ni hiyo.

⁸¹ Vano Logos emosaru yeele yookhalana epantte, Owo ookhalana Mwaakameliwa, ni Logos emosaru, Masu ala ahikhanle orukunxiwaka, amphuramwela ikereja olelo, aphavelaka ohokoloxa Masu wooniherya Waya woomalela. Yeeyo, ma—maprofeta yaari-aya anamakuxa Epyo yeeyo, ni miromolelo sa ekereja sinikhalaka anamakuxa Epyo vano. Vano

nwehe, naakuvaka, masi ntoko nikatamphe nimpatikhaya, ninkhalanaya Epyo vano, nuumala ninoochiya.

⁸² Yesu aari Muluku. Aari Yoowo. Atithi Awe yaari Logos yuulupale Eneene. Ni Owo khaakhanle oyeeheryaka yothene Eyo mwa Moise, maana owo aari profeta.

⁸³ Ni Masu a Apwiya okathi wothene, khanvonyaka, animurweela profeta. Khanikhanle hata nipuro, hata okathi, mBibiliani, wala opacerya Bibilia, vaavo otaphuleliwa woolikana wa Masu amurwenlyaya teyooloku. Khekhanle mwa Soolempwa. aFarisi khanatoko, aSatukhi khanatoko, ni Muluku khonanvenxeke profeta mwa hata mmosa a yaawo, ni Owo khonatoko wira mahiku ala ookiserya.

⁸⁴ Emalaka-ru ovenya, othene yaamuthukumana ni opaka mutthenkeso wa yeeyo, waakhwa vaavo. Masi waari mwaha wa niwoko Owo iirenyawe yeela. Ninoophavela otaphulela, Muluku anikhaliherya. Nwehe, moone va moota elattanne aya yeeyo, ekereja, epyo vano, eniphiyerya olattana ni Epyo Eneene.

⁸⁵ Vano nwehe, okathi epyo enkhuruwelaya mutthayani, ti epyo yoopacerya. Okathi emphuwaya, enkumiherya ekumi. Masi ekumi ya etriku eniira exeeni? Eyo khenkumiherya mutathi mmosaru w'etriku okathi ene yoowo, ahiiso enuku emosaru ya etriku. Eyo ekumi ya etriku, masi eri okathi wa namakuxa. Ni iwo waari orehererya woopacerya, okathi Lutero okhummyawe mw'epiphini mwa evitikavitika. Yaahaana okhwa.

⁸⁶ Imaara sinci-ene, athu anookhupanyerya. Oh, ni miyo koosoma elivuru emosa woohikhala khalayi, ya, *Muluku Oomaala*, yowooniheriwa ni anafilosofiiya ala a vano aneererya wookumihani wa Muluku. Mwaahisuweleke Masu a Muluku ni etthokiheryo ya Muluku, munoowerya ottikinyiwa vookhweya-vo. Masi moonaru etthunelo ya Muluku, etthokiheryo Awe, nto ni waamini moosuwela wira ti Muluku; ni Muluku aisuwanyehaka Mmansawe, airaka paahi ele Owo iiralyawe mwa—mwa wakathi sikina, eettaka, ooniheryaka.

⁸⁷ Mwaha wa yeeyo Moise ahaakhanlyawe ottikinyiwaka. Owo aahilavula ethoni ni ethoni ni Muluku, nto Muluku khimuleela, “Miyo ka Yoole aari ni Abrahamu ottuli wu. Miyo ka Yoole omulampe natiri ula. Miyo kinookhala ni nyuwo.” Munrowa omweemexa sayi mulopwan'owo nto?

⁸⁸ Ntoko profeta a khalayi sihimalyawe, “Kharamu akhuwela vale, taani ohinoova? Ni Muluku oolavula, taani ohinrowa olaleerya?” Noonaka itthu Muluku olaihenryawe ewoorala, woona okhunuwa, munwerya sayi okhala oomaala moonaka wira ti enamuna Awe? Etthu Owo ohimmyawe, wira yaamwiiraneya. Woona itthu sothene sa mwiiriirya, masi vekeekhai ti siiso Muluku ohimmyawe wira yaamwiiraneya.

⁸⁹ Vano nwehe, “owo,” namakuxa. Vano, Hakari aarwiye ntoko mutathi, vano nto khurwa ekhitta, vano nto khurwa nikatamphe,

vano nto khurwa Epyo. Vano nkaaweheeni anamakuxa ala, kintthuna wira nwehe, toko.

⁹⁰ Vano, mutathi khonlattana nnakhala ni Epyo, masi Ekumi yaari muhina mw'Epyo eri mmutathini. Owo aari Lutero. Vano, mutathi mukhaani khoreerane makukhu; akhumme mwa Lutero, mpakha Zwingli, arowaka mpakha Kalvino ni anci-ene akina.

⁹¹ Vano nwehe, nto, eyo yaahipatili opuro aya. Nwehe ephattu vano, epakaka ntoko Masu a Muluku, ntoko nsuwa: okhwa, ovithiwa, ni ohihimuwa. Nto khurwa ekhitta, owo aari Wesley. Ni mwa vaavo saahikhala ikhitta sinci-ene sikhani soowiithomeya vaavo, seiyo tthiri saalattanaxa ni Epyo ovikana nikukhu nle, vatrikuni wala nakhuwo. Khiyaareere olattana ni yeeyo; okhala wira, Wesley ni Masu aneili, Masu a Muluku aneili, avenxaka ekereja Awe, yaahivira mwa oreerihiwa. Owo waari mutthaka awe. Vaareera.

⁹² Vano, nuuvira okathi vakhani, eyo yaahikhuruwa khurwa-tho mmutathini, khukumiherya nikala na nakhuwo. Masi mukala ola ohinatthi opacerya, waahikhala otatha, nikatamphe, okhuneela, nłaxi. Ni khula mulimi a etriku, mulimi a nakhuwo, mwaphavela-ru vo khukuxa nikala nle na nakhuwo wala nikala nle na etriku, nyuwo munimuupuwela wira ekhaani ele—etthu ele ekhaani yoopacerya ti enuku yeele ya etriku. Masi, vano, wookhala okathi wa Pentekosite. Vano khimukhanle, nyuwo, khula teyooloku wala . . .

⁹³ Khula nammulepa wahala, kiireke, onnisuwela wira iyo wakathi, enamuna iyo sinrwaya. Mukuxe e—Eliivuru ya Wiisuupulula, mukuxe wakathi sa ekereja, moone vahaakhanle siiso iyo sintaphuwaya.

⁹⁴ Vano, okhuma Wesley yaahirwa Anawetta a Osantu, aNasareeno, ni ikereja iye sothene sikhaani sa osantu, vakhiviruxa va Masu ovikana orehererya wa Lutero waaryaya. Masi, moone, Lutero vatthokinhe awe, eyo yaahipacerya makukhu ale. Nto ela varuulyaya, Erooho yothene yaahihiya ekereja Luterana ele, othene ohiya ya muromolelo paahi, ni alipa-oowaamini eekeekhai yaakenle mwa oreerihiwa.

⁹⁵ Vano nto okathi oreerihiwa orukununwe aya, Anawetta a Osantu, n'akina, ni mitthenkeso sothene sa osantu, aNasareeno, ni sikina, Eyo yaahikhuma vaavo, orwa olukama okathi ola wa Pentekosite. Ni nwehe enuku eyo yaamukhaani vano, ya etriku, enkhala yoolattanaxa vaara imilyawu ni etriku yoopacerya, yaakenle mutthayani, ovikana mutathi wala ekhitta. Masi mwakilaathi-ru, muhela vathi va lenti, khutthukula makatamphe ale makhaani, ni awo anamakuxa paahi. Enuke khenatthi opacerya nlelo. Niitho nikhaani paahi epantte y'ottuli, ni mikroskoopiyu vanooweryaneya woona epontha ele yaamukhaani, ntoko epontha ya alufaneti, vo enrwa

epyo. Nto nikatamphe nla va ninlikana oratteene ni etthu y'ekeekhai, kehiyo etthu y'ekeekhai. Nlo nipwiipwi paahi.

⁹⁶ Ntoko mmirimani mwa Maria. Maria khaari Epyo, mwa ethooneryo va ya mutathi. Owo aari namakuxa paahi a Yeeyo, ntoko ale akina. Masi akhalaka oowiiitthaniwa ni oothanliwa toko, ni Muluku Mwaneene, mwaha wa niwoko nenla, yaahikhalaxa ntoko apatthani ahu aKatolika yuupuwenle aya, wira owo aari mai a Muluku. Nnari, owo khaari mai a Muluku, owo nnakhala khaari Epyo ya Muluku.

⁹⁷ Muthiyana onkumiherya nooce. Muluku onkumiherya e—ekumi. Emoklopiina, ephome, eri mwa mulopwana.

⁹⁸ Mwalyakhu onoowerya orela nooce wala mwaapalame onoowerya orela nooce, okathi w'ephovo onteka epuru awe, masi, mwaapalame ole eethiyana aahikhale—ru ni mwaapalame eelopwana, khonrowa otothola. T'okhwa. Nnimuntta mweepuruni mwemmo.

⁹⁹ Ntoko sihimmye aka imaara sinci-ene, owo ti mulattu ni ikereja olelo, iyo sinimuntta mw'epuruni, siniitthaniwa Metotista, Patista, aPentekosite, ni sikina. Awo yaahikumane—ru ni Masu, Ene, awo animuntta mw'epuruni mwene, mmutthenkesoni mwaya.

¹⁰⁰ Vano, vano akina aya aniira nto wira, muPrustante onnikhala ntoko waamini wira aari Maria aakumihenrye nooce. Vaakhanle siiso, nkawehani etthu munimwiirihanyu Yehova Muluku wira. Nooce khanikhanle okhumaka vahikhanle moonelo.

¹⁰¹ Tivo, moone, Muluku aapattunxe soopiili nooce ni eropo, Owo aapattunxe soopiili mmirimani mwa Maria. Vano Mutthu ole khaari hat'etthu woohikhala Muluku Mwaneene oowiipaka erutthu khukhala ni hiyo, Emanuweli, kahi mutthu ooreera murima paahi, profeta; Owo aari Mutthu ooreera murima ni Profeta; kahi purusoore, teyooloku. Oh, Owo khino—Owo pooti aari sothene iyo; Owo aari Othene mwa-Othene. Masi vasulu va sothene iyo, Owo aari Muluku Mwaneene. Bibilia ohimmye wira, “Hiyo ninoopoliwa ni Ephome ya Muluku.” Muluku Mwaneene, kahi mutthu aneeraru wala mutthu aneili. Mutthu, Muluku Mwaneene, Yehova muulupale, aamukhuneenle Maria; ni Mpattuxa, aaptunxe erukuruku y'ephome, ekumi, ni noce.

¹⁰² Mwawerya omwiiriha muYuta woona yeeyo, nyuwo... owo onoomusuwela Ole okhanle Mesiya. Okathi John Rhyn aavonihiwe awe iwe oBenton Harbor, aari oochoona mwa miyaakha miloko mixexe. Rabbi ule aarookikoha, owo iirale, kaarina nvaanelo ni yoowo, owo khwira, “Khimukhanle omuthikilaka Muluku ipantte tthaaru khunvaha muYuta.”

¹⁰³ Miyo khwira, “Akina anniira. Masi hiyo khanimmuthikila Muluku ipantte tthaaru.” Miyo khwira, “Nyuwo munniwaamini maprofeta?”

“Vekeekhai, miyo kinniwaamini maprofeta,” owo khuhimya.

¹⁰⁴ Miyo khwira, “Yesaya aamuhimya pani, Yesaya 9:6, ‘Nooyareliwa Mwaana mulopwana?’”

Owo khwira, “Vano, aari Mesiya.”

¹⁰⁵ Miyo khwira, “Omusi xeeni onrowa okhalana Mesiya ni Muluku?” Eyo yaahooniherya mwaha ene. Miyo khwira, “Vano. . .”

Owo khwira, “Onrowa okhala Muluku.”

¹⁰⁶ Miyo khwira, “Vekeekhai voolikana. ‘Nsina Nawe onrowa wiitthaniwa Namiruku, Mwene a Murettele, Muluku a Ikuru, Tithi a Mahiku othene.’”

¹⁰⁷ Ti vaavo a Unisista avonnye aya, ti vaavo Oraaru ovonnye aya, ipantte soopiili sa ephiro. Masi eriyari yoolikanela enkhalaneri yari ya awo aili. Vaakhanle wira Muluku aamuwerya okhala Tithi Awe Yoowo, vakhala wira Yesu aari Tithi Awe Yoowo, Owo khaakhanle okhalaka. Ni Owo aakhalanne-ru tiithi mukina woohikhala Muluku, ni Bibilia ohimye wira “Erooho Yoowaarya” aari Tithi Awe, nto vakhala wira iyo irooho piili soovirikana, Owo aari mwaana oohiphwanela. Ti yeeyo. T’ani aari Tithi awe Yoowo, Muluku wala Erooho Yoowaarya? Nyuwo muhimye wira mmosa nwehe moota munrowanyu wuuliwa muru. Muluku aari Tithi Awe. Eyo ekeekhaii?

¹⁰⁸ Matewu 1:18, Owo ohimye wira.

Vano oyariwa wa Yesu Kristu wiireiye so: Aryene . . . Maria maama awe oowaakameliwa ni Yosefe, awo ehinatthi okhala vamosa, owo aahiphwanyaneya oorupala a Erooho Yoowaarya.

¹⁰⁹ Vano T’ani okhanle Tithi Awe? Moone, munnoona entthunaaka ohimya? Nwehe.

. . . Yosefe iy’awe, aari mutthu a xariya . . . ahitthunaka omulaleya, aahuupuwela omuhiya ni mwitiho, siisa.

Vano, owo atthokelelaka itthu iya, . . . nlaikha n’Apwiya naahimukhumelela moolohani, niiraka, Yosefe, nyuwo mwaana a Davidi, muhoovelele omwaakhela mwawinyu. . . wa nyuwo Maria mwaar’inyu: maana ole omurupanle-awe t’a . . . [Muthukumano oniira, “. . . Erooho Yoowaarya.”—Mol.]

¹¹⁰ Miyo koona wira awo yiirale, “Muluku Tithi aari Tithi Awe”? Oh, mateyooloku, ori vayi osuwela wanyu?

Nwehe, “Onookhala Waarya okathi wa makaaripi!”

¹¹¹ Epyo y’ekeekhai erwiiye okhuma mwa Maria, masi khiyaari Epyo awe. Aari natiri a Muluku, owo iirale-awe, “Miyo kiri va murumeyi a Apwiya.” Anamakuxa ekumi yaari athiyana. Nto vano, Maria, Epyo yoolattanaxa.

¹¹² Hakari aahaana waakhela mwa enamuna yoothononiwa. Saara, ahoveyaka etthu ene, aaruuhale epyo y'erutthu paahi, otthuna w'ekhapa. Masi Maria, voohikhala hata ekhapa, aaminni Masu, nto Masu khwiipaka erutthu.

¹¹³ Masi nwehe, Maria akhalaka oolattanaxa, owo aarina Epyo mmirimani mw'awe, ni yaakhala wira yaari Epyo awe. Ni siiso ti yaaryaya ni aPentekosite. Kinrowa ophiyerya exeko. Masi muupuwele, Yesu oohimya, mwa Matewu kapiitulu 24, versiikulu 24, "Mahiku ookiserya, irooho soopiili..." Kahi mahiku oopacerya, vano. "Wakathi sookiserya, irooho soopiili saarowa okhala soolattanaxa mpakha saarowaya omoototha ole oothanliwa vaakhanle wira vaaniweryaneya." Erooho ya Pentekosite, vekeekhai ntoko etthu y'ekeekhai, yoolikanaxa yaarowaya omoototha ole oothanliwa vaakhanle wira vaaniweryaneya.

¹¹⁴ Vano, awo kahiyo moolumo aka. Eyo t'ile Owo ohimmyawe. Vano, nuuvira okathi, alakela nyuwo munookhalana osuwela wa etthu emphavelaaka ohimya. Vano Osuulu ule vekeekhai waakhalaxa ntoko...

¹¹⁵ Nikatamphe nle naakhalaxa ntoko Epyo, hata ovikana ekhitta ene, ni ovikanaxa mutathi, masi awo yaari anamakuxa paahi a Epyo. Moone, Lutero aahitthokiha, mutathi khukhwa; Wesley aahitthokiha, ekhitta khukhwa; Pentekosite khutthokiha, ekumi khukhwa. Nto vano enrwa Epyo. Khivanweryaneya orowa-tho ovikana Epyo.

¹¹⁶ Nwehe, moovirani mwa miyaakha sothene, okathi mweettelo muulupale onkhumelelaya, naanaanoru ottuli waya onrwa mutthenkeso. Miyaakha soophiyaka miraru ti ntoko okathi onkhalaya, nuumala anootthokiha, empaka mutthenkeso. Anciene ahaana okhumelela mwa yeeyo; ntoko anci-ene wa Lutero, makukhu; ni anci-ene mw'ekhittani, Wesley; ni mataakhuru aPentekosite ephuwelaka, omosa, opiili, oraaru, oxexe, othanu. Oh ikharari! Munnona?

¹¹⁷ Masi, nwehe, miyaakha miloko miili sa Yesu Kristu oowooniheriwa! Nnakhala mutthenkeso mmosa khokhumelenle, ni hata mmosa khonrowa okhumelela; onimookhwa ntoko mweettelo wothene wa epula yookiserya, ni sothene sikina. Ola okathi wookiserya, Epyo, ni khenrowa orithi ni malaxi, ni nnakhala vakhani Iximayeli arithiki ni Isakhi.

¹¹⁸ Munnoona va moota olattanne aya, oolattanexa voophiyerya wira wootothe. Lutero, mutathi; Wesley, ecera; ni Maria, nikatamphe, wala mmirimani, wala Pentekosite. Moota kaakhanle aka okelaka va vanikatampheni vo, ni owoonihani. Moovirani wa okathi, khenakhalaxeke yoolattana ntoko elattanne aya vano. Itthu sothene ekerejaa, *ekereja*, moone, "eyo."

¹¹⁹ Ni nwehe, aari “muthiyana,” wopaceryani, aamuhovenrye natiri oopacerya. Khaari Muluku aakumihale Masu Awe. Muluku khonttikiha Masu Awe olelo; Owo onlipiherya Masu Awe oopacerya! Masi Saara iirale, “Khino, alakela; ninoolipelela.”

¹²⁰ Owo t’okhanle mulattu n’atthu olelo, nyuwo muneererya owela etthu muhinsuwelanyu etthu munwelanyu. Munrowa wira sayi voohikhala wira munoosuwela eniiranyu? Muneetta ni maitho oottiyeliwa? Mweereryaka owela etthu muhinsuwelanyu eniiranyu, munoomora. “Mulipa-oohoona aamweettihaka mulipa-oohoona, owaili aya anoomorela mulittini,” Yesu oohimya nuulumo nlo.

¹²¹ Masi vano hiyo nimphwanyaneya okathi wa Epyo. Vano Epyo enookhalana, (Exeeni?) okhaliherya, enimwiiwanana ni Epyo evarelelaka Yeeyo. Eyo yaaheliwe vale mwaha wa niwoko nenlo, wira ekhalane Yeeyo.

¹²² Okhala wira, siiso nsuwa ninkhumelaya woopaceryani wa ephovo, etriku, nwehe ephattu yothene moovirani wa ehuhu orukunuwa, moovirani wa nihiku orukunuwa, sothene orukunuwa voolikana ene, ni Muluku. Vano okathi nsuwa nle nooviha nimpaceryaya waaryela epyo, eyo enoomela. Masi olumwenku ohaana okhala mwa mukhalelo mmosa wira okhumelelihe epyo ele vatthayani. Ohaana orukurerya epantte ela, ni ophierya nipuro nimos a wira emelihe epyo ele. Waahaana orwa enamuna yeeyo, wira ovenxe va . . . okathi w’epiphi.

¹²³ Atthu amosa-amosa . . . namuulumela ola kihimmye aka olempe eliivuru, *Muluku Oomaala*, owo iirale, “Moovirani wa wakathi sothene s’epiphi, anamakhwela waamini ale oowooniha othunku, ahookhwasa, aKristu ale, ni Muluku okilaanthe-ene Wirimu ntoko wira Owo hata khaacaliwa.” Vano, wooniha othunku mulopwan’owo, oohisuwela etthu, oohoona, mutthu oohoona mwa erooho, vaakhanle wira maitho awe yaahitthukuwa mano! Khamunsuwela wira epyo ehaana okhala vatthayani, wira ekhwe ni wuntta, ehinatthi owerya omela-tho?

¹²⁴ Ni ekereja ya pentekosite ekhwiiye, mwa ekereja Katolika yoopacerya. Ni eyo tthiri erwiiye mwa mukhalelo wa mutathi, masi munnoona moota enkhalanaya mukhalelo woolattana, khula emosa, moovirani mwa okathi wa Luteraano, Wesley, ni wa Pentekosite? Munniwa?

¹²⁵ Vano Eyo ehaana otthikela muteko ole woopacerya Owo aarinaawe mulaponi mu, okhala wira ti Mwaakameliwa. Awo ari mmosaru. Vano Owo aahilaiherya, mahiku ookiserya, moota itthu iya saarowaya okhumelela. Ni hiyo ninnoona iyo sikhumelelaka, ntoko anatiri othene, Malakhiya 4, Luka Oowaarya 17:30. Oh, Soolempwa kavi sikina, yaamukhala yohimala!

¹²⁶ Ni, oh, kihaana weemela, okhala wira vahooxa. Ayo. Vaareera, nyuwo—nyuwo mwaaleele, moone sinto anoowerya

ophwanya...Nyuwo mwaakohe, moone, vano nto murwe mukileele. Vano, minuutu mmosa paahi. Kinnitthunaxa, oleeliherya ela, moone. Miyo—miyo kinnitthunaxa, wira moone yeela. Nkawehani, Yesu...Nwehe, moone, Mwaakameliwa.

¹²⁷ Nnakhala vo, ninniphwanya wira, okathi ula ninkhalahu vano, moone, wira mmirimani, mutthenkeso wa Pentekosite, waanilattanaxa ni etthu y'ekeekhai. Masi nyuwo muhona wira, Wisuupulula 17, oitthanne ekereja Katolika y'oRooma, mutthenkeso woopacerya, "namuttompe"? Akavi ansuwela wira eyo ekeekhai? Akavi ansuwela wira owo aari mai a anamararuwa? Exeeni muthiyana oohureya? Vano, Owo ohimmye wira muthiyana'ola aari "ekereja." Namuttompe exeeni? Ti muthiyana oohiroromeleya ni natiri awe a moothelanani. Exeeni namararuwa? Etthu emosaru, nuulumo nimosaru.

¹²⁸ Vano, eyo yaahiyara. Enamuna xeeni ya oyara? Kahi Masu, masi oyariwa wa mutthenkeso. Va siri Metotista, Patista, ni aPentekosite, ni othene aya akunxe mihapo sa mai aya. Khula muthiyana oohilakeya oCalifornia onniwerya omuyara mwaaruusi harusi; ni mwaha wa yeeyo mutthaka woopacerya waaruulaya, masi okathi ekeekhai yooniheriwaya okathi wa Lutero, wa oreerihiwa, owo khaawenrye ovilela. Okathi opatiiso wa Erooho Yoowaarya otthuniheriwaya, yooniheriwa aMetotista, awo khawenrye ovilela. Nto vano, okathi wa Epyo omukumihenryaya Pentekosite, owo khonwerya omwaakhela Owo, owo ohiitthokiha, masi onnikhalaka namakuxa Epyo, moone.

¹²⁹ [Munna mmosa onlavula elavulelo ekina. Nipuro vahiitthu mufiitani—Mol.] Amen. Vano ninnaaxukhuru Apwiya mwaha wa yeeyo, Masu, wiiveyiha wa Masu ahimmwe.

¹³⁰ Moone, ti yookhweya, siiso ntoko mwa yeela, siiso ntoko onweha nakhuwo annuwaka. Nyuwo khamurina yo okhalana otaphulela wuulupale wa teyoloxiia wa yeela. Nwehe paahi. Nyuwo mwa...Owo ori vakhiviru ni nyuwo, okathi wothene. Moone, e...eyo e...

¹³¹ Kihaana omaliha. Kirimoona epurulo ekhaani, ni kinvekela wira aire yeela. Nihaana omaliha. Vano, munna, moonelo mmosa paahi, nto kinoorowa.

¹³² Nkawehani, vano, nikatamphe, mutathi, ni sikina, t'anamakuxa Masu paahi. Awo yaarina epannte ya Masu, moone, mpakha vamoralaya; okhalihwa naxariya, oreerihiwa, ohokoloxiwa wa soovaha mwa—mwa aPentekosite. Masi vano nwehe. Siiso ntoko Iximayeli saaryawe, Isakhi, moone, vano nto wa Yesu; moone, mmosa aari oohononeya, mmosa aari ooloka, nto va enoorwa Epyo Eneene. Munnona? Vano, ekereja erwiiye mwa etthu ene yeeyo, etthikaka. Ntoko nluwa wala etthu p'itthu ekina, ninoowurya, ninoonuula, ni orowa...

¹³³ Eyo khenihimya wira Luteraano oopweteya. muLuteraano okhooottale oreerihwa, aamukhala, onthhuna ovarelela etthu... Moone, Isarayeli aalyaaka emana esya khula ohiyu, moone. Nwehe.

¹³⁴ Masi vano okathi wookiserya, nwehe nikatamphe nla va, vano nwehe, etriku. Esiiri yoomalela ya—ya Ekumi etthukiwe ekanyeryo muhina mwa nikatamphe nenlo. Ninnoona eyo mwa Lutero, emelaka. Ninnoona eyo mucerani, ekhumaka. Ninnoona eyo mmutathini. Noophiya, nto vano eri ntoko nikatamphe, voohalela olikana okathi wa Pentekosite, masi mwiiriirya w'ekeekhai wiipithihiwe muhina.

¹³⁵ Vano muupuwele, voolikana ni Wiisuupulula, esiiri yothene ya Eliivuru etthukiwe ekanyeryo ni Ikanyeryo Thanu na piili, anamarehererya yahaakhalanne aya mureerele wo wooniherya, ivirelo sooxeexe sa anamarehererya, ivirelo sooxeexe sa Axinama axexe yaaronwe okumana ni owerya mixexe wa molumwenkuni. Yoopacerya yaakhumme, yaari e... .

¹³⁶ T'ani aari oopacerya aakhumme? Mwatto, wira akumane ni okathi w'oRooma. Awo yaari Masu, oopacerya. Owo ti Mwatto a nloko na Yuta. Kristu Mwaneene aahirowa okumana ni okathi ole. Ti pani aari mwaaxinama oottharelana aaronwe okumana; mwaxinama oottharelana aakhumme, wira akumane ni nakhavalo mukina, aari t'uvi? Moone, nakhavalo ole oopacerya aawanre sootteela, oowarihiwa ekhara mmuruni, ohoolo waya, ni siiso, masi muura woohikhalana matthere.

¹³⁷ Nwehe ekhavallo yaneili yaakhumme, Mwaaxinama aaronwe okumana ni yoowo yaari enyompe. Enyompe enama ya mukuttho. Yaahikhwela waamini okathi wa epiphi.

¹³⁸ Enama yaneexexe yaaronwe okumana ni ekhavallo yootharelana, ekhavallo ya okhwa ehinatthi okhuma, okhwa ni omooroni, ekhavallo yootharelana yaaronwe... Enama yootharelana yaaronwe okumana ni nakhavallo a nihiku nle, yaari Enama ni ethoni ya mutthu. Akavi ansuwela yeeyo? Okathi w'akhili, anamareherya, Lutero, Wesley, Kalvino, Knox, Finney, Moody. Munnona?

¹³⁹ Masi nto nwehe, exeeni yaakhumme okathi wa makaaripi? Xawawe, ya oprofeta emaara ekina. Onookhala Waarya okathi wa xawawe, ephiro ya Movuwani vekeekhai munoophwanya, O Ekereja ya Muluku mukumi!

¹⁴⁰ Kaanithhuna kaawerya orwa va ni—ni okilaathi paahi voosiisu, ni okhala nihiku nothene, opatthana ni nyuwo mwa itthu iya. Nwiriyaane, munuupuwela wira nkinsiveliwa ni nyuwo? Miyo kinnoophentani, axinn'aka. Miyo—miyo—miyo kaanithhuna orowa wa khula mutthenkeso ni opa...ni—ni waamini ni khula mmosa. Masi, moone, khinwerya tu. Vannirika okhala mukhora kintthukuleliwaaka.

¹⁴¹ Miyo kinrowa elapo emosa vano voohisuweliwa, mwaha wa mutthenkeso, okhala wira awo khanihiya muteko Muluku... Kihaalepela ewarakha kiwaakhulaka, kiirale, “Mwa miyaakha muloko kinniphavelaka orowa. Nto nyuwo ni opatiiso anyu wa ololo!”

¹⁴² Mmosa aya onaamini wira muhaana opatisiwa vaara vararu: vamosa wa Atiithi, ni vamosa wa Mwaana, Erooho Yoowaarya; nwehaka ohoolo. Mukina khwira, “Nnari, muhaana opatisiwa vaara vararu: vamosa wa Mwaana, vamosa wa Atiithi, ni Erooho Yoowaarya.” Ni soopiili soovonya.

¹⁴³ Mmosa khwira, “Owo, muttthu ompatisiwa mwaha wa okhwa Wawe, ni Owo uuramenle ohoolo okathi Owo okhwiyawe. Hiyo nimpatisiwa mwaha wa okhwa Wawe.” Mukina khwira, “Taani ommusikha mutthu amuuramelihaka vathi? Onvithiwa ettuli awe.” Ethiru iyo, yaavalaanihaka atthu, eyo enooniherya wira nrima. Eyo ti ya Satana. Kehiyo ya Muluku.

¹⁴⁴ Variyari va ipantte soopiili, Muluku khokhanle hata epantte emosa, masi Owo oniihana ipantte soopiili, “Mukhume eriyari aya, mwiivalaanihe, onihimya Muluku, nto Miyo kinoowaakhelani wa Yoomi.”

Muluku ooreeriheni. 

65-0429_B Epyo Khenrowa Orithi Ni Malaxi
Oteeli Biltmore
Los Angeles, California wAmerika

EMAKHUWA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org